

【一隻飯包】劉玉蕉原作

「過晝哩，請一儕領一隻飯包轉去食！」

雅秀四正个外形，嗯，看起來毋會媼！領著飯包，一陣燒暖傳到手項來，還貼心哦，還有一杯燒湯呢！恁用心个飯包，哪訂个？看真了，燒暖退忒一半，「信望愛甜甜屋」，腦膈肚浮出一隻畫面：嘴開開、眼呆呆、行路踉踉蹌蹌，無定著還流等口涎个一群人，心肝肚恁：敢好食？有淨俐無？

在車肚，飯包像搞怪个細孺仔共樣，帶等暖暖仔个香氣，遊遊野野¹搵到歸車仔飯菜香，錫到肚屎嘅哩咕嚕緊抗議。毋過心肝肚還係無確定，這隻飯包到底食得無？

轉到屋下，飯包還溫燒溫燒，像拆祕密禮物个心情趕緊打開飯包。「哇！」香氣衝到鼻公項來，錫人合萋倬倬仔²个菜色，看得出做飯包人个認真，菜色還多哦！記毋得、算毋出有幾多種還過有哪兜仔菜，就知五穀飯又球又軟，豆腐乾燂³到會承牙⁴，青菜油光油光，鹹淡乜堵堵好落嘴。平常時外背食飯，驚怕蒂頭無洗淨，乜驚農藥言過，毋敢食青菜。今晡日天公落紅雨了，食

到一息菜都無伸。該菜蓋⁵頭當會園泥个位所，挑挑擘開來檢查，當場感動到心肝肚五味混雜，實在淨俐！第一擺食著恁歡喜，恁放心个飯包，難得个係飯包肚看毋著有加工過个齋料，除忒好食，還較多个係感心！

飯包既經食忒了，溫暖个感覺跔喉嚨行到心肝肚。係仰般个愛心同耐心，分訓練个先生甘願挑戰高難度，付出加倍个時間來指導該兜慢板、毋即靈个一群人？愛花幾多心血正做得出恁樣高水準、有品質个飯包？「一枝草一點露」，因為先生，佢兜除忒畜飽自家以外，乜減輕了屋下人个負擔。天公少分該群人某種能力，毋過訓練先生發揮人性个光明面，教佢兜打開另外一扇窗門，毋使靠人同情、救濟，擎起釣枰就釣自家想望个彩色魚。邊脣幫襯个偲兜儕，除忒欣賞、鼓勵，更加需要个係支持。希望社會个溫情能得像佢兜个飯菜香共樣，傳到長長久久。

¹ 遊遊野野：音 iuˋ iuˋ iaˊ iaˊ；閒蕩。

² 萋倬倬仔：音 qiˊ qiogˋ qiogˋ eˋ；潔淨的樣子，此指新鮮而亮眼。

³ 燂：音 biag；用油乾炒。

⁴ 承牙：音 siinˋ ngaˋ；食物有韌性，口感彈牙。

⁵ 菜蓋：音 coi habˋ；菜葉。